

小倉山房詩文集

冊六

THE UNIVERSITY OF CHICAGO

1964

小倉山房詩集卷二十六

己亥庚子

錢塘袁枚子才

正月二十二日出門作

衰年作事當收棋檢點遊裝有所思江上風花趁春日家鄉弋釣憶兒時殘書看慣隨身帶愛子初生負襁隨自笑此行緣底事西湖還欠幾行詩

秦園

爲高必有因爲園必有藉美哉秦家園竟把惠山借入門先見水得樹便忘夏縱橫兩石橋屹作天河跨紆轉山徑曲琮琤泉響瀉濕衣嵐翠飛打頭松子下得意在邱壑忘言到亭榭我來四十年品題殊未暇底事忽留詩再遊心再化

第二泉

清絕形難比源深取不窮知名不知味來往一杯同

兩夜泊嘉禾訪陳梅岑秀才次日喜晴同遊烟雨樓三塔寺

久輟牙琴感索居一朝親叩子雲廬船衝急雨剛停槳手握詩人便起予嬌女

抱來冰雪似華堂指點火焚餘卅年世好三年別說到深情海不如

相約鴛湖打槳行萬金難買此宵晴一樓烟雨人初到三塔風光水正生桃尚
留花待殘客柳如招我過清明白頭愛話悲懽事紅盡桅燈未入城

入武林城作

肩輿望見聖湖烟觸目情生故國天不是還鄉是尋夢一邱一壑總纏綿
雖名故土全無屋且喜殘春尚有花笑挈姬人住僧舍不成孤客不成家
安排遊計首頻搔客裏光陰怕寂寥晴日尋山雨尋客不教孤負一春宵
成見年來久不存麻鞋隨處踏芳塵朱門蓬戶無分別只要能容自在身

西湖德生菴小住

遊山如讀書少年力不努垂老意愴然亟亟還思補我本西湖人久離西湖土
當其家居時頗爲一城阻及乎宦遊後更覺相思苦今乃白頭來卜寓在湖所
有如久饑人見物思盡取又如矍鑠翁餘勇必盡賈朝將湖烟吞暮把湖月吐
行湖一枝筇盪湖兩枝櫓湖意亦懽迎浪花如雪舞

月夜斷橋獨坐

一輪月一個我半夜斷橋相對坐湖光照月月增清月色當湖湖更大滿湖烟
起將山烝山容若睡喚不應我亦下橋覓歸路緊認僧菴一點燈

孤山

一山自起伏不藉羣山扶既不傍城郭又獨占裏湖頗似臯夔世別有巢由徒
宜乎數千年獨居處士逋自呼梅爲妻自畜鶴作孥雖捐茂陵稿恰修薦賢書
倘非際明盛寧肯効區區我攜影獨來一僮一僕無問我胡爲然也學孤山孤

登六和塔

一塔表江清觚稜夕照明盤旋看下界絕頂見平生乍上微嫌黑彌高轉不驚
縱教吹落地也有半年程

遊紫雲金鼓諸洞

看山恃一筇有境我必到垂老戒在得山靈莫相笑初尋紫雲幽再探金鼓奧
泐泐石乳滴蹠蹠仙鼠跳古藤高擎空丹厓低設竈穴深不可測誘我往前導

忽然一梁橫故意將人拗喜無元霜侵永辭白日炤偉哉真宰心戛戛喜獨造
鬪險乃出奇因空始見妙寄語世間人頑石猶有竅

謁岳王墓作十五絕句

靈旗風捲陣雲涼萬里長城一夜霜天意小朝廷已定那容公作郭汾陽
遠寄金環望九哥一朝兵到又回戈定知五國城中淚更比朱仙鎮上多
一個西湖換兩宮靖康小雅唱雍雍憐他絕代英雄將爭不遲生付孝宗
軍令如山鳥不譁黑風龍虎盡呼爺自然慈聖還宮日苦向官家問岳家
歲歲君臣拜詔書南朝可謂有人無看燒石勒求和幣司馬家兒是丈夫
要盟結贊屢彎弓翻錄和戎魏絳功老住迷樓人不醒趙家天子可憐蟲
小校桓桓道姓施湧金門外有專祠雄心似出將軍上不斬金人斬太師
要結中朝絳灌懽分將戰艦贈同官韓王心喜張王惱始信人間送禮難
允升一疏奏楓宸與汝何干竟殺身擬把東廂添配享黃金鑄個布衣人
華表凌霄落照遲一朝孤憤萬年知梨花寒食燒香女纖手都來折檜枝

不依古法但橫行自有雲雷繞膝生我論文章公論戰千秋一樣鬪心兵
五十三人命已休秦城王氣忽然收教渠暫緩須臾死那數中原劉彥游
身後何曾有定論金陀野史仗文孫紫陽譚語瓊山繼燭火無光照覆盆
恰有狐疑問殿前周歆入廟竟身顛史駢敵怨分明在只恐當年事偶然
江山也要偉人扶神化丹青卽畫圖賴有岳于雙少保人間才覺重西湖

孫秀姑墓

我年八歲才讀書大母爲言孫秀姑今年六十偶行路得見秀姑湖上墓秀姑
生長貧家裏髮髻便行拜時禮郎小從師赴學堂姑衰抱病居田里隣家嚴虎
里中豪望見嬋娟眼欲燒初將軟語投梭誘繼嫉妖童作餌挑女兒自是女貞
木豈許纖埃污白玉已歌暮棘刺陳佗重上輜車詈董卓匪人窮怒轉成羞道
不穿墉誓不休朝擲餅金窺浴所暮隨鴟吻望牆頭秀姑膽小空房怯生恐雄
狐勢漸逼皎月當天自有光紅蘭拒雪愁無力層層縫裏舊衣裳訣別慈姑掩
洞房一夕伯姬雖命絕十旬劉表尙屍香官吏聞之愧無狀急擒鼠輩尸諸巷

扁表巍峨北闕來風雲蕭瑟西湖葬此事茫茫八十春當時碑碣漸沉淪寄言
當事徵文獻且莫修培蘇小墳

時西湖修蘇小墳不知小墳在嘉興見武林舊志

三月四日項金門秀才招同吳西林汪槐堂諸公補修禊詩得春字

卅年不見故園春一夕南還得主人佳節已過修禊日華堂還召苦吟身酒邊

分韻詩隨意花下談禪鳥問津

西林夢樓席間談禪人多避席

恰好山陰儂買棹蘭亭方欲訪

前因

贈金門

之子武林秀相逢喜不禁惜春常速客得句便題襟雅抱推袁意難忘說項心
爲君歸緩緩湖上落花深

雲棲寺

竹密不見天竹盡乃見寺相傳蓮池師于此建初地匪徒參高禪亦且見小智
矮屋難搖風戒嚴易蕺事眷屬許同宿貴賤無二味更有終老堂窮氓隨所寄
一切部署法井井有條例宜乎十方民甘心多布施禽學梵貝音草帶靈檀氣

我亦如閒雲一宿了來意

放生所

天性人爲貴庖犧見理明傷人不問馬宣尼分重輕魚鱉稱咸若未必非杯羹
陋哉西方教兼愛徒硜硜人物混爲一不界濁與清我來放生所刺目尤心驚
雞餓且啄距牛呿半陷阮頑鵝瘦于雀仙鹿穢若蠅是謂違物性桎梏加天刑
放乃未嘗放生不如無生

見雨中喚渡者

船家鎮日喚人行雨後無人肯應聲載得白鷗三兩隻水紅花處倍分明

贈撫軍王味隲先生

中丞家世重瑯琊浙水緣深兩建牙謝傳經綸多靜鎮汾陽福力自豪華潮聲
曉應千家笛燈影宵紅四壁花豈獨惠民兼禮士四方名宿走雷車

曾蒙草奏牧秦郵回首恩門感未休

枚牧高郵先
中丞所薦

一樣憐才家法在卅年往事

水東流星雲有耀能垂蔭蒲柳將衰易感秋願得白頭還故里村村扶杖聽歌

謳

清明

枝枝楊柳可憐生
朵朵梨花笑不清
四十年前舊遊客
故鄉今日過清明

月夜老姊兩姬挈阿遲泛舟西湖予亦追至孤山小飲而返

門外一舟泊小僮偷掉之
舉家遊西湖主人猶未知愛茲明
月光亦復呼舟往
相逢孤山巔彼此各停槳
酒家未關門遣僕沽一壺
空明水晶宮團圓家慶圖
小醉將舟泊人生且行樂
月照子若妻已成梅與鶴

題萬九沙先生小像

有序

先生諱經康熙戊辰翰林任學使
罷官乾隆元年召試鴻博以老疾辭
全謝山作公車徵士錄海內凡一百
八十人序齒先生冠首枚署尾今
年在杭州其季子福持遺像索題

當年丹詔召耆英
驥尾龍頭記得清
未共殿前揮采筆
忽從畫裏見先生
春風有影鬚眉在
流水無聲歲月更
幸喜小同才絕世
禮堂經學繼康成

淨慈寺回舟湖中風雨暴作

一角雷峯黑三潭雨忽狂小舟如鷁退高浪比人長
荇藻難援手蛟龍欲入艙
倘非風少定幾作水仙王

施將軍廟

將軍名全以小校刺秦檜不克死

一德格天閣正新一刀殺賊乃有人數天冤憤仗誰雪
殿前小校施將軍將軍煉心如煉鐵可惜荆軻疎劍術
事雖不了神鬼驚懸頭市上香三日當時元姦黨滿朝
縛虎如羊氣太驕忽然刀光狹路照太師頸上風蕭蕭
嗚呼三字獄兩宮駕總在將軍此刀下後代聞英風
尙且有興者君不見腦碎銅椎阿合馬

萬松書院

萬松環一嶺書院建其巔我昔來肄業弱冠方童顏
當時楊夫子經史腹便便門牆亦最盛濟濟羅諸賢
我每遇文戰徹夜窮鑽研至今咳唾處心血猶紅鮮
何圖目一瞬垂垂五十年先師墓木拱諸賢盡雲烟
我來重過此几席猶依然

誤欲往學舍執卷趨師前昔也離家遠廿里走僦僦今也升講堂一步一扶肩
昔爲服子慎絳帳時周旋今爲蒯子訓摩挲銅狄仙逝者竟如斯能無意自憐
羨殺丹桂花無言但參天

偕阿遲上冢

周晬嬌兒索乳忙抱來學拜祖塋旁春風似解人間事一縷香烟吹漸長

渡錢塘江

卅年前渡此江風白髮重來似夢中就使江神最強記也難認得此衰翁

禹陵二十四韻

天地平成始皇王禪讓終一人生石紐萬古闢蠶叢玉斗胸垂象金輅耳啓聰
尋書齊委宛受牒作司空地險龍門鑿人功鳥道通爲魚援赤子幹蠱慰黃熊
學裸姑徇俗乘櫟又轉蓬庚辰禽水怪豎亥步崆峒貳負甘雙桔將軍號百蟲
嘗聞下車泣忍過羽山東破石佳兒出開山遁甲窮勤能師畢子威不赦防風
息壤波全息扶桑日更紅過門心淡泊造粉事朦朧鑄鼎神姦列遐方玉帛同

偶然巡越甸遽爾墜軒弓身自跳天上棹應葬穴中葛綳烟露冷陽昞水雲空
復土來蒼鳥南風送祝融江山猶拱侍廟貌更穹隆真冷懷文命偏枯想聖躬
兩廂環岳牧九殿拜兒童空石摩挲古衡碑刻劃工微臣擎旨酒不敢獻元宮

蘭亭

爲有蘭亭序青山屬右軍清流猶映帶名士盡烟雲嘆逝能無感論書孰與羣
偶然數行字千古訟紛紛

王右軍祠

荒祠碑記永和年東晉衣冠尙宛然觴詠偶留修禊帖安危能上會稽箋書名
太重經綸掩兒輩分甘樂事偏我欲奠公無別物一籠鵝放惠風天

西施廟

人去苧蘿空香烟恰未終死猶存越廟生可想吳宮溪水浣紗影虛廊響屨風
金錢輸一見交與守祠翁

傳說西施祀鑑湖一帆先自走菰蒲三千年後情如許可是前生范大夫

石屋寺

怪石墜空天臥地猶露縫一手推可搖萬年吹不動石旁有古寺峨峨紺殿垂
終朝鐘鼓寂但見鳥雀窺肅愍留手迹寺有于肅愍手書迢迢三百秋問僧僧不知愈
覺山中幽西齋尤奇絕懸厓接屋瓦不敢開牕看亂山如走馬

吼山

山頂麥開花山腰石張口我舟昂然來直向口中走其中別有天澄泓水百畝
亦復構亭榭高下羅八九絕壁摩蒼蒼似將長劍剖斜削爲鼉梁架空拖石紐
偶然聲咳聲千山齊一吼水深試以篙不知有底否但見大魚游吞餌幾吞手
我遊山川多此景駭未有爲之泊舟看自午直至酉

禹陵大松歌

我來禹陵見大松身橫九畝疑防風當日定爲蒼鳥種後來不受秦王封扶桑
遮日松遮雨各護神聖安元宮旁有窆石形奇古堪與千年松作伍想見龍牽
引綽時呱呱后啓猶摩撫諸侯會葬紛來朝此松未必無枝條蒼水使者來挂

縑百蟲將軍不敢燒山風吹松作濤起髣髴洪水聲滔滔我欲呼松問禹狀松不能言徒崛強且折松枝滿載歸驚夸法物商周上

湖上雜詩

浮家泛宅幾回遷

先寓德生菴再遷陳莊

遷得西湖到榻前從此欄杆憑不了雨餘風定

月明天

月明如水浸沙隄隄上游行一杖攜惹得家僮沒尋處夜深孤坐斷橋西
桃花吹落杳難尋人爲來遲惜不禁我道此來遲更好想花心比見花深
范公祠裏藕花居四十年前我讀書今日再來人不識自家一步一躊躇
誰家愛唱玉玲瓏笛自西飄曲自東一夜蕩搖聲不定知他船在水當中
飛飛小艇慣穿雲傍晚招人到夕曛底事游蜂頻繞槳兒家衣是藕花熏
烟霞石屋兩平章渡水穿花趁夕陽萬片綠雲春一點布裙紅出採茶娘
坐看陶莊瀑布飛珠璣吹滿芰荷衣癡心欲向山僧說水不流還我不歸
遠望雲鬟意態佳近前凝視眼頻開豈知卽是我家婦一笑各詢何處來

葛嶺花開二月天遊人來往說神仙老夫心與遊人異不羨神仙羨少年

花神十二最清華齊著雲裾踏鴈沙擬向江淹分彩筆一章詩贈一枝花

冷泉亭上草如茵鎮日看泉泉滿身天竺過門偏不入觀音應不惱詩人

鳳嶺高登演武臺排衙石上大風來錢王英武康王弱一樣江山兩樣才

六陵何處認冬青望帝魂歸淚欲零偏有子規不解事聲聲啼與岳王聽

山無佛像山纔古水有魚船水不幽我愛九溪十八澗把人引去又勾留

金泥光閃梵王宮簫鼓沿隄鬪晚風從古繁華春世界朝陽不及夕陽紅

隻雞斗酒淚潸潸師友墳前薦一餐只有杜鵑心似我滿山紅與故人看

桑女留儂住小車春蠶食葉響沙沙一甌水白茶如雪足抵人間七品家

金史七品

官纔許
飲茶

遊遍山南與水南就中何處最心貪爲他幽絕遊難盡兩度呼車別理菴

丁丁鑿石嶺雲開魚鳥咸知萬歲來世界昇平山水福五年一度換樓臺

春宵知是可憐宵柳下呼舟月下搖消受水晶宮世界四更猶有滿湖簫

贈轉運陳藥洲先生

隱隱金鉦雲外飄，紅旗影共酒旗招。爲憐碧草開三徑，特訪幽人到六橋。僧換袈裟迎上客，吏隨啼鳥報花朝。多公心似西湖月，肯向禪樓照寂寥。

南衙文宴敞罽毼，爭誦仙郎館課詩。

公子□官庶常

入席東南名士滿，通家姓氏小君

知。夫人爲李存存先生之女，見枚名紙。驚曰：此五十年前先君門下士也。

庭無雜草香生早，座有歌童客散遲。更

許劉楨作平視繡帷，新得好瓊枝。

謝趙耘菴觀察見訪湖上兼題其所著甌北集

乍投名紙已心驚，再讀新詩字字清。願見已經過半世，深談爭不到三更。花開錦塢登樓宴，竹滿雲棲借馬行。待到此間才抗手，西湖天爲兩人生。集如金海自雕搜，滿紙風聲筆未休。生面果然開一代，古人原不占千秋。交非同調情難密，官到殘棋局可收。我倘渡江雙槳便，定來甌北捉閒鷗。

大姊索詩

六旬誰把小名呼，阿姊還能認故吾。見面恍疑慈母在，徐行全賴外孫扶。

名阿常